

Schnitzelbängg Les Chanterelles 2021

A dere Fasnacht duen i bocke
will i keim uf e Schoss dörf hocke
s Schmützli gäh chunnt scho gar nid in Frog
die Corona isch e ächti Plog

Wär wott trotzdem e Schanterelle-Kuss
das isch - mmmh - immer no ne Gnuss
ah nei, du dörfsch jo nid do ane cho
drum mache mir das halt eso:

Positiv isch guet, so hei mir's glehrt
i der Pandemie isch s grad umbekehrt
positiv isch schlächt und negativ guet
zum Glück nimmt der Trump ändlich der Huet.
Wäg dene hoche Zahle wo der Biden hett
hett der Trump gmeint, i mach jedi Wett
das syg glych negativ wie bi de Corona-Fallzahle
doch s Gegeteil isch der Fall bi de Wahle

D Greta hett e Schwöster becho
wo ihre hilft die Flugi am Bode loh
e Lockdown im Früelig und scho isch guet
d Corona hett Diktatur im Bluet

Was die zwo hei chönne, das cha d SBB scho lang
ohni Lockdown, plant vo langer Hang:
eifach gwüssi Zugverbindige stryche
wäge Lokführer-Mangel muesch uf e Bus uswyche

Der Gwärbverein KMU vom Laufetal
will dass me ihne telefoniert, ganz banal
si hei gnue vo dene Internet-Päckli
wäge däm lütte mir jetz aa wäge jedem Dräckli

Im Lockdown hei mir d Bühni gruumt
Fotene sortiert und dr Teppich gschuumt
Chinesisch glehrt und afo musiziere
jetz isch's eus langwylig... mir düen telefoniere

S erst Moll syt's die Summerzyt gitt
mach i die Zytumstellig gärn mit
im Früelig stelle mir d Uhr uf drei am zwei
das heisst mir si ei Stung weniger ygsperret dehei

Hundert, fufzig, drissg oder zäh
Fufzäh, foif? Weli Zahl selle mir näh
was gilt für d Gruppegrössli wäge Corona
der Gwärbverein weiss es, dank dra, lütt aa

Maske schütze gege Gstank uf de Toilette
gege Autiabgas, gege Rauch vo Sigarette
spare chasch bi Make-up und Sunnegreem
Zahn putze muesch nümmi, so bequem

Uf dr Röschenzstross hett's ke Mittellinie meh
derfür e gääli für d Velo, hesch se gseh
wo sell i fahre, druff oder näbdra
i dank dra und lütt am Gwärbverein aa

Stets i truure

Stets i Quarantäne mues i läbe
säg mit was han i's verschuldt
will i z lang a dir bi blybe chläbe
mues i's lyde mit Geduld

Bisch mir zwar us mine Ouge
aber nid us minem Sinn
hätt i dir doch sölle gloube
dass du d Corona hesch i dir drinn

Rächti Liebi chunnt vo Härze
rächti Liebi die brönnt heiss
oh wie doof si de die Schmärze
mi Körper brönnt, i bi voll Schweiss

I bi gäng nonid kuriert
der Daniel Koch isch pangisonert
är hett der Corona müesse ungerschrybe
dass är geit, u si cha blybe

Jetz mues i doch no is Spital
u zwar i das vom Louffetau
dä Vertrag isch gwährleistet uf Duur
z Liestel gseh si das nid so stur
das isch nid s glyche wie: uf ewig
mir säge am Thomas Weber nume: schwyg

Bis die Corona-Wälle sich hett gleit
bis vo dr Angst mir sy befreit
wott i die Zyt nid lo verstryche
i füll' se mit Liebi u derglyche